

monitoring report

Izbori u BiH '96

bulletin of the institute for war & peace reporting & media plan

24 juli 1996

broj 8

Sedmični pregled BiH medija: 15-21 juli 1996

Velika drama, koja je pratila uklanjanje Radovana Karadžića sa mjesta predsjednika vladajuće stranke u Republici Srpskoj, dominirala je medijima u sedmici, koju je, takođe, obilježio i službeni početak predizborne kampanje u Bosni, koji je utvrdila Organizacija za bezbjednost i saradnju u Evropi (OSCE). Je li Karadžić napustio politički i javni život zauvijek, kao što su to zahtjevali zapadni pregovarači? Ili je možda njegovo uklanjanje još jedan taktički manevar, kao što su to nagovještavale izjave političara iz RS, sa opreznim psihijatrom, optuženim za ratne zločine, koji se sklonio iza kulisa, da bi sačekao posljednji čin.

Zaključci koji su objavljeni u bosanskim medijima su brojni i kontradiktorni. Dok, s jedne strane, nema sumnje da se predizborna kampanja sada može odvijati u miru, s druge strane, isto je tako jasno, da Karadžićeva sudbina nije riješena i da će on ostati ključna figura u predizbornom procesu. OSCE se zakleo da će obezbijediti da se Karadžić ne pojavljuje u medijima bosanskih Srba. Ali OSCE tek treba da odredi mjere, koje će primijeniti, kako bi se ova odluka i poštovala. Raniji nagovještaji sugerirali su da će mediji bosanskih Srba nerado prihvatiti Karadžićevu ostavku ali, i da bi njegova politička žrtva mogla postati glavno načelo predizborne kampanje. Slobodan Bijelić, potpredsjednik SDS, izjavio je 20 jula na **Radiju RS**: "Ovo nije kraj, jer će srpski narod glasati za Karadžića, glasajući za SDS."

Međutim, uprkos rasprostranjenom hvalisanju, izgleda da su telegrami i zborovi podrške, koji su obilježavali politiku RS proteklih mjeseci, za sada zaustavljeni. Prijetnje bojkotom, pa čak i osvetom strancima, koji su smješteni u RS, izgleda da su također nestali, nakon posjete gospodina Jovice

Stanišića, moćnog šefa bezbjednosti Slobodana Miloševića, Palama. Krajem sedmice čak je i vršilac dužnosti predsjednika RS, Biljana Plavšić, progovorila u pomirljivom tonu, izjavivši 21 jula za **Radio Kragujevac**: "Nećemo preduzimati nikakve rizike, koji bi mogli ugroziti srpsku naciju. Mislim da su razgovori u Beogradu, i dogovor koji smo postigli, uklonili neke barijere vezane za budućnost Republike Srpske, koje je postavila međunarodna zajednica." Službeni mediji RS striktno su se pridržavali linije, koja je naznačena u izjavi SDS, kojom se podržavaju izbori, kao način potvrđivanja državnosti RS.

S druge strane dejtonske razvodnice, bosanski predsjednik Alija Izetbegović, pozdravio je Karadžićevo uklanjanje kao "kapitulaciju", ali su opozicione stranke ostale i dalje kritične prema učešću SDS-a na izborima. Međutim, izgleda da su prijetnje bojkotom, koje su najavljivale političke stranke iz Federacije, vrlo brzo zaboravili i političari i mediji. Sa svoje strane, **RTV BiH** je propustila da objavi izjavu SDSa obrazlažući potez Karadžića

Intenzivna pažnja, koja je bila usmjerena na partiju pokera, koju su igrali Pale i Beograd, prijetila je da zatamni sve druge događaje i polemike od vitalnog značaja za izborne aktivnosti. **Radio BiH** bio je jedina informativna kuća, koja je detaljno izvijestila i o drugoj polovini misije Ričarda Holbruka (Richard Holbrook) u bivšoj Jugoslaviji. Navodeći neimenovanog dužnosnika iz pratnje američkog diplomate, radio je javio 18 jula, kako je Holbruk zahtjevao da hrvatski predsjednik Franjo Tuđman preduzme hitne mjere, kako bi osigurao ukidanje vlade "Herceg-Bosne". Neimenovani diplomata opisao je "Herceg-Bosnu", kao bolesnog pacijenta, koji mora umrijeti. Ma šta da

je Tuđman poduzeo, izgleda da je to samo ojačalo nadmenost bosanskih Hrvata u Mostaru.

Krajnji rok za registraciju birača, 31 juli, također je privukao pažnju medija, kao i očigledni slučajevi manipulacije. Mediji u RS, ali i u Federaciji su se trudili da uvjere izbjeglice i raseljena lica, kako je njihova patriotska dužnost da glasaju u novim mjestima boravka, a ne u općinama, u kojima su živjeli prije rata.

Uprkos prisutnim manipulacijama i smetnjama, mnogi mediji nastavili su da nude programe posvećene predizbornoj kampanji, koji su bili profesionalno izbalansirani i lišeni emocionalnih poticaja. Bosanska štampa, predvođena *Oslobođenjem* i *Večernjim novinama* u Sarajevu, i *Panoramom* u Bijeljini, također je nastavila da objavljuje informativne i analitičke tekstove posvećene izborima, pridržavajući se standarda o ponašanju medija, koje je utvrdio OSCE prije dva mjeseca.

Medijsko pokrivanje u Republici Srpskoj

Službeni mediji u RS predstavili su konfuzno, i često kontradiktorno burne događaje prošle sedmice, ostavljajući možda slušaocima i gledaocima da promišljaju o drugim historijskim epovima, u kojima su porazi pretvarani u pobjede.

U prvim izvještajima, koji su uslijedili nakon Karadžićevog smjenjivanja sa položaja predsjednika SDS, 11 jula, **Radio Srpska** skrušeno je objavila da se povukao s mjesta predsjednika RS. Činjenica da je Karadžić popustio pred pritiskom Zapada i da je pristao da se povuče iz javnog i političkog života, saopćena je tek kasnije u emisiji i to samo indirektno, u komentaru Vojislava Šešelja ultranacionalističkog vodje iz Beograda. Povratak Ričarda Holbruka na scenu balkanskog sukoba, također, nije uopće spomenut u dnevniku na **Radio Srpska**.

Mediji u RS koristili su u velikoj mjeri saopćenje SDS-a, u kome se optužuje međunarodna zajednica za zavjeru da se uništi RS, zabranom SDS-u da učestvuje u izborima. Karadžić je žrtvovao svoj politički položaj za budući prosperitet srpske nacije i RS, kaže se u komuniqueu. **RTV Srpska** pročitala je ovo saopćenje u cijelosti i popratila ga komentarima najviših predstavnika

RS. U jednom dijelu izjave stoji: "Doktor Karadžić smatra da je naša dužnost da izadjemo na izbore i damo svoje glasove SDS, tako da marionete (opozicione stranke u RS) i muslimanske stranke ne dobiju jednu trećinu glasova, koja im je potrebna da utope RS u B&H."

Ulagivanje političara RS Karadžiću bilo je krajem sedmice u vrhu svih informativnih programa **RTV Srpska**, premda je ton bio pomalo funebralan. Na proslavi, kojom je 21 jula obilježeno osnivanje jedinice Armije bosanskih Srba, poznate pod imenom "Vukovi sa Vučijaka", Momčilo Krajišnik je pozdravio skup "U moje ime i u ime čovjeka koji zaslužuje vašu podršku, daleko više od mene ". Dva dana prije toga **Radio Srpska** citirala je "anonimnog dimlatu" iz Londona koji je rekao da će Karadžić opstati, zato što je on "heroj svih Srba."

Uprkos svojoj sklonosti ka oštrim uvodnicima, **RTV Srpska** nije direktno komentirala Karadžićevu sagu, niti se bilo koja RTV stanica pozvala, na bilo koji izvor osim izvora dužnosnika RS. **Radio Krajina**, vojna stanica u Banja Luci, bila je ponovo jedina stanica u RS koja se ponašala nešto drukčije od stanica na vladinom radiodifuznom opsegu.

Radio Krajina bila je, takodjer, jedina stanica, koja je izvijestila o Trećem kongresu Srpskog građanskog vijeća u Sarajevu. **Radio Krajina** je saopćila da je cilj vijeća da djeluje kao "most koji će pomoći pomirenju građana B&H različitih nacionalnosti." Stanica je javila da su medju 400 delegata i gostiju, koji su bili na kongresu, bili i predstavnici stranaka i udruženja iz Republike Srpske.

Ljutina, koja je zaprijetila da izbacii bosanske izbore iz kolosijeka, nije ugušila predizbornu kampanju u medijima RS. U večernjem terminu, na **TV Srpska**, nastavljeno je svakodnevno emitovanje programa namijenjenih predstavljanju političkih stranaka. Lider Socijal-liberalne stranke, Miodrag Živanović, pojavio se sa zakašnjenjem 17 jula, kako bi predstavio svoju platformu. Premda su telefonske reakcije gledalaca bile jednoliko neprijateljske, voditelj programa ostao je neutralan. Dan ranije, predstavnici Građanske demokratske stranke za B&H (GDS), sa sjedištem u Federaciji, morali su se boriti protiv često uvrijedljivih pitanja. Ipak, predsjednik GDS, Ibrahim Spahić pohvalio je **TV Srpsku** zbog prihvatanja demokratskog kodeksa, time što je

pozvala stranke iz Federacije da učestvuju u programu.

Ima neke ironije u činjenici da je **RTV Srpska** trenutno jedina vladina televizijska stanica u Bosni, koja emituje razgovore sa političkim strankama iz oba entiteta. Premda je **RTV B&H** najavila da će od 15 jula ponuditi političkim strankama desetminutne termine, izgleda da emitovanje tog programa neće početi prije 29 jula. Pored toga, **RTV B&H** je, u "Dnevniku" 18 jula, objasnila da nije primila ni jedan zahtijev stranaka iz RS da učestvuju u televizijskim debatama.

Približavanje krajnjeg roka za registraciju birača pružilo je medijima u RS još jednu priliku da prodube liniju etničke podjele u Bosni. **RTV Srpska** emitovala je brojne izvještaje, čija je pažnja bila usmjerena na izbjeglice, koje su odlučile da se prijave za glasanje u svojim novim domovima. Implicitna poruka u ovim izvještajima bila je, da bi bilo nemoguće glasati u bivšim mjestima boravka. **Radio Prijedor** bio je još direktniji u komentaru objavljenom u "Dnevniku" 17 jula. Kontekst za ovaj komentar bio je protest izbjeglica iz Drvara, koje su se odupirale pritisku da se prijave za izbore u općini Prijedor, i koje su zahtijevale da glasaju u svom predratnom mjestu boravka. Odbijanje **Radio Prijedora** da izvjesti o ovom incidentu, nije spriječilo ovu stanicu da optuži učesnike protesta za izdaju. U komentaru se kaže: "Oni ljudi koji podržavaju opciju glasanja u odsustvu vrše direktan napad na srpsku naciju."

Bez kontakta

U trenutku kada je trebao predstaviti predstavnike Hrvatske čiste stranke prava, 18 jula, voditelj programa **Srpskog Radija** "Direktna linija" saopštio je da gosti nisu stigli u studio. Voditelj je obavijestio slušaoce da će dati predstavnicima stranke 15 minuta da se pojave - tačno onoliko vremena, koliko studenti moraju čekati profesora, koji kasni. Zatim je dodao: "Nećemo nagađati zašto se gospoda iz Hrvatske čiste stranke prava nisu pojavili na vrijeme u studiju **Radija Srpske**. Ali zar se ne bismo morali zapitati, da nije politička aktivnost vojnika, pripadnika te stranke, u prošlom ratu, nepodnošljivi teret i tamna i neizbrisiva mrlja, koja im ne da mira?"

Sljedećih 15 minuta bilo je popunjeno sa "Maršom na Drinu", "Tamo daleko", i drugim srpskim pjesmama. Pozvani gosti nisu stigli.

Tuzlanska TV

Televizijsko informisanje u Tuzli i dalje kviri otvoreno preferiranje SDA (Stranka demokratske akcije) na kantonalnoj stanici. SDA želi pod svaku cijenu da dobije izbore u Tuzli, drugom najvećem gradu u Bosni i uporištu opozicije. **TV TPK**, jedna od dvije stanice u Tuzli, zadužila je ovu stranku iscrpnim i povoljnim izvještavanjem.

Teško da bilo šta, što SDA uradi u Tuzli, promakne pažnji glasnog dnevnog informativnog programa **TV TPK**, - "Dnevnika". Stranačke izvještaje, konferencije za štampu, promocije, najave sastanaka - o svemu tome "Dnevnik" marljivo javlja, ponekad veoma opširno. U sedmici od 15 do 21 jula "Dnevnik" je posvetio dvostruko više prostora SDA, nego svim drugim strankama zajedno. Opozicione stranke rijetko se spominju, obično pri kraju emisije i nikada sa istim entuzijazmom.

"Dnevnik" izvještava o opozicionim strankama samo kad sazovu konferenciju za štampu. Kad je SDA u pitanju, "Dnevnik" bilježi čak i ako vrabac padne. U "Dnevniku" 19 jula, najavljen je skup SDA, zakazan za sljedeći dan i citiran je jedan od SDA-ovih slogana: "Bili smo s vama kad vam je bilo najteže, sad imamo priliku da vam omogućimo najbolje." Sljedećeg dana, "Dnevnik" je posvetio četvrtinu emisije izvještaju, u kome se sa divljenjem govorilo o skupu. U izvještaju su prikazani, ne samo kandidati i puna dvorana, nego i policija i predstavnici Armije, koji su došli da daju svoju podršku. Stranački simboli, transparenti i slogani ispunili su ekran. Da gledaocima ne bi promakla poruka, kamera se upadljivo usredsredila na bedževe SDA, posebno na jedan, koji je bio na kragni mlade djevojke.

TV TPK zanemaruje druge događaje u Tuzli, čiji je gradonačelnik Selim Bešlić, predstavnik protivničke stranke UBSD (Unija bosanskih socijal-demokrata). Kada su predstavnici Tuzle i hrvatskog grada Osijeka, 16 jula, potpisali povelju o prijateljstvu, "Dnevnik" je to spomenuo tek kratko na kraju emisije. Znak dobre volje s druge strane etničke crte mogao je zanimati ljude u Tuzli, posebno Hrvate, ali ovaj događaj je kolidirao s nacionalističkom porukom SDA i mogao je pomoći gradonačelniku. Premda se ovaj događaj zbilo u Tuzli, "Dnevnik" je jednostavno preuzeo informaciju općinskog Press centra, i propustio da spomene učešće gradonačelnika.

TV TPK pokazala je svoju naklonost prema SDA i mnogo prije nego što je službena kampanja započela prošle sedmice. Ta naklonost bila je vidljiva već prošlog mjeseca, kad su se SDA i UBSD sukobile oko komemoracije održane povodom artiljerijskog napada, u kome je u junu 1995, ubijena 71 osoba u Tuzli. **TV Tuzla**, općinska stanica, priklonila se u sukobu UBSD i gradonačelniku Bešlagiću. **TV TPK** stala je na stranu SDA.

Izgleda da se malo toga promijenilo na **TV TPK**. Dobra vijest je što je **TV Tuzla**, premda vezana za gradsku vladu, dokazala da je sposobna za fer i ujednačeno izvještavanje. U posljednje vrijeme, **TV Tuzla** je izvještavala o skupovima svih stranaka, uključujući i SDA. Neke emisije bile su kritički intonirane prema SDA, ali je stanica omogućila SDA da saopći svoje stavove. Vrijedi zabilježiti primjer koji se desio 16 jula, kada je jedan glasnogovornik SDA optužio gradonačelnika da zloupotrebljava svoj položaj u političke svrhe.

Hrvatska Televizija

Prošle sedmice vijesti **Hrvatske Televizije** (Zagreb) podcrtale su hrvatsko nezadovoljstvo Evropskom Unijom, zato što je prihvatila rezultate mostarskih izbora, uprkos nepravilnostima u glasanju u Njemačkoj. U "Dnevniku" od 16 jula, Mijo Brajković gradonačelnik zapadnog Mostara i u posljednje vrijeme najpoznatije lice u ovoj emisiji, ponovio je da je administrator EU, Rikardo Perez Kasado (Ricardo Peres Kasado), prekršio zakon i da Hrvati ne mogu prihvatiti njegovu odluku.

U povodu izbora u Bosni, stanica je svakodnevno emitovala pozive bosanskim Hrvatima u Bosni i inostranstvu da glasaju. Ovi pozivi miješali su se s ponovljenim tvrdnjama da je hrvatski narod ugrožen izbornim pravilima, koja dopuštaju izbjeglicama da glasaju tamo gdje žive, a ne tamo odakle su došli. U emisiji nazvanoj "Raskršća Federacije", koja je emitovana 19 jula, predstavnik HDZ-a (Hrvatska demokratska zajednica) upozorio je da su Neum, Stolac i Čapljina, u Hercegovini, i hrvatski gradovi u centralnoj Bosni u posebnoj opasnosti. "Stranke mogu dirigitirati i manipulirati biračima", objasnio je on mračno. "Srbi će glasovati samo u Republici Srpskoj, a Bošnjaci će postupati drugačije".

Drugi izvještaji nastojali su da posiju sumnju u iskrenost federalnog partnera bosanskih Hrvata.

"Dnevnik" je 19 jula izvijestio o hapšenju hrvatskih oficira u Jablanici, muslimanskom gradu, i rekao da je hapšenje naređeno od strane bosanskog predsjednika Alije Izetbegovića. ("Oficiri su pušteni tek nakon ozbiljnih prijetnji Amerikanaca", rečeno je.) U "Dnevniku" je ignorirana neugodna vijest da su Hrvati u Mostaru uhapsili šefa policije iz Jablanice. Sljedećeg dana "Dnevnik" je javio o opasnostima s kojima su suočeni Hrvati u Bugojnu, većinskom muslimanskom gradu u centralnoj Bosni. Novinar je rekao da su suočeni sa stalnim uznemiravanjem i fizičkim prijetnjama (uključujući i prijetnje ručnim granatama).

Od samog početka, **Hrvatska Televizija** je tretirala bosanske izbore ne kao borbu političkih stranaka, ili demokratsku borbu političkih alternativa, nego kao prijetnju hrvatskom narodu. Nacionalno pitanje zatamnjuje sva druga. Česti nesporazumi sa bošnjačkom stranom koriste se za podsticanje i učvršćivanje političke homogenizacije. Jer, u svijetu **Hrvatske Televizije** HDZ je neprijeporni predstavnik hrvatskog naroda. **Hrvatska TV** ignorira opozicione stranke, ona se pretvara, kao da ne postoje nikakva politička neslaganja. Priznati nešto drugo značilo bi štetiti nacionalnoj stvari.

FERN

OSCE je prošle sedmice konačno pronašao svoj glas, upravo u vrijeme službenog početka kampanje. 15 jula počela je sa radom Radio mreža Slobodni izbori (**Free Election Radio Network**), radio stanica koju finansira Švicarska, i koja emitira informacije vezane za izbore, kako za bosansku Federaciju, tako i za Republiku Srpsku. **FERN** ispunjava jedan dio ambicija međunarodne zajednice da pomogne pluralizam medija u Bosni i da premosti granicu, koja razdvaja većinu medija u dva entiteta. Drugi dio te ambicije- nezavisna televizijska mreža, kasni u pocetku.

Od ove dvije mreže, radio je, dokazano, važniji medij: više Bosanaca sluša radio, nego što gleda televiziju. A sa svojih osam predajnika, **FERN** ima veliki domet. Emitujući na FM (101.3 u Sarajevu) **FERN** tvrdi da pokriva 81 posto bosanske Federacije i 66 posto Republike Srpske.

Stanica je smještena u Sarajevu i zapošljava 20 Bosanaca, uključujući i dopisnike iz važnijih bosanskih gradova. Na konferenciji za štampu, koja je održana prošle sedmice, švicarski

organizatori **FERN**-a insistirali su na činjenici, da će bosanski novinari imati punu slobodu u svom radu. Većinu **FERN**-ovog programa čini popularna muzika, odabrana tako da privuče mlade i sredovječne slušaoce. Ali šema pokrivanja izbora na ovoj stanici je ambiciozna: vijesti svakog sata, razgovori sa kandidatima i drugim gostima, govorni programi, emitovanje informacija o događajima vezanim za izbore i predstavljanje političkih stranaka. Pored vlastitih dopisnika, stanica prikuplja vijesti iz bosanske, hrvatske i srpske štampe, kao i vijesti domaćih i stranih agencija. Jednom dnevno na programu je pregled pisanje domaće i strane štampe.

FERN je također počeo emitovati, ili planira uvesti, i duže programe. U polusatnom programu, koji se emituje u 17.30, predstavljaju se poznate politička ličnosti. Dva puta dnevno stanica emituje 20 minutne programe OSCE-a, namijenjene obrazovanju birača. Stanica planira uvođenje programa, u kojima će učestvovati i slušaoci. Dokazano je da su ovi programi najomiljeniji u Bosni. Stanica također namjerava predstaviti političke stranke, dvije dnevno, premda ove emisije nisu emitovane prošle sedmice.

Hoće li neko slušati ovaj radio? Uspjeh OSCE-a da utiče na izbore ovisi ne samo o kvalitetu **FERN**-ovog programa, nego i o sposobnosti **FERN**-a da privuče slušaoce u periodu koji nas dijeli od izbora. Ovo posebno vrijedi za Republiku Srpsku i Herceg Bosnu, gdje je medijska situacija bezbojna.

Drugi veliki projekat, podržan od međunarodne zajednice, **TVIN** televizijska mreža, imaće na raspolaganju još manje vremena. Njeni organizatori kažu da ne očekuju da će ova stanica početi sa radom prije sredine idućeg mjeseca.

Izborna kampanja u sarajevskoj štampi

Nakon kratke stanke, štampa je ponovo posvetila značajan prostor predizbornoj kampanji. Neizvjesnosti i lutanja oko službenog početka kampanje, izazvale su samo manje interesovanje u sarajevskoj štampi. Medjutim, nekoliko listova iskoristilo je ovu priliku da ponovo kritikuje predstavnike OSCE zbog neuspjeha u stvaranju uslova za slobodne i fer izbore. Ali, uprkos takvim kritikama, svi listovi i časopisi prihvataju realnost izbora.

Pored činjenice da je posvetila više prostora opozicionim strankama, bosanska je štampa u posljednje vrijeme otvorila svoje stranice i za zbivanja u oba entiteta. Ovo je djelomično rezultat izvrsnog izvještavanja, koje nudi novinska agencija AIM, ali isto tako i odraz postepenog otvaranja televizijskih emisija za stranke iz drugog entiteta. Ovo je skroman, ali ohrabrujući početak, za slobodan protok informacija preko bivših linija fronta.

Prilozi u listovima čiji se sadržaj direktno ili indirektno odnosio na izbore 1996.

Period pokrivanja: 15 do 21 juli 1996 Dnevni: *Oslobođenje, Večernje novine, Dnevni Avaz.*

Sadmični, petnaestodnevni i mjesečni: *Svijet, Ljiljan,*

naziv lista	broj listova	broj priloga	broj priloga po broju	najčešće zastupljna forma
Oslobođenje	7	68	4-17 articles	vijest, izjava, izvještaj
Večernje novine	6	58	5-17 articles	vijest, izjava, intervju
Dnevni Avaz	6	61	7-12 articles	vijest, izjava, izvještaj
Svijet	1	1		komentar,
Ljiljan	1	2		komentar, apel

Voli me, ne voli me....(2)

Tabela ispod prikazuje prisustvo političkih stranaka, njihovih vođa i koalicija u medijima Federacije (RTV BiH) i Republike Srpske (RTV Srpska) u sedmici od 8 do 14 jula. Kolona sa nazivom "Total" govori koliko su puta jedna stranka ili njen lider direktno ili indirektno predstavljeni ili pomenuti u centralnoj informativnoj emisiji RTV BiH i RTV Srpska. Svaku stranku prati rezultat koji se potpisuje vrijednošću +1 za svako

pozitivno pominjanje, 0 za svako neutralno pominjanje i -1 za svako negativno pominjanje. Kolona ($\Sigma (+,-,0)$) predstavlja sumu ovih ocjena. Što je veći broj pozitivnih poena to znači da su mediji imali pozitivniji odnos, naklonost ili simpatije, odnosno, što je veći broj negativnih poena, to su se mediji prema stranci ili njenom predstavniku odnosili sa više kritike ili antipatije.

Mediji koji su posmatrani u ovu svrhu su RTV BiH i RTV Srpska. Analizirane su samo glavne vijesti dana.

ime stranke / koalicije	RTV BiH		RTV Srpska	
	total	$\Sigma (+,-,0)$	total	$\Sigma (+,-,0)$
<i>stranke</i>				
Stranka demokratske akcije	20	+3	7	-7
Srpska demokratska stranka (SZ)	19	-5	45	+43
Hrvatska demokratska zajednica BiH	6	-1	4	-4
Srpska radikalna stranka RS	-	-	2	+1
Stranka za BiH	4	0	-	-
Srpska patriotska stranka SPAS	-	-	3	0
Narodna stranka RS	-	-	5	0
Srpska stranka Krajine	-	-	2	+1
Liberalna Stranka BiH	2	0	-	-
Liberalno bošnjačka organizacija	2	0	-	-
Bosanska stranka	2	0	-	-
Građanska demokratska stranka BiH	6	-1	-	-
Muslimansko bošnjačka organizacija (1) (2)	4	-1	-	-
Hrvatska seljačka stranka BiH (1) (2)	1	0	-	-
Unija bosanskohercegovačkih socijaldemokrata (1) (2)	4	0	-	-
Socijal demokratska partija BiH (1) (2)	4	0	-	-
Socijalistička partija RS (4)	-	-	1	0
Jugoslovenska levica RS (JUL) (4)	-	-	1	0
Socijalno-liberalna stranka RS (4)	-	-	1	0
Stranka nezavisnih socijal-demokrata RS (4)	-	-	1	0
Nova radnička partija	-	-	1	0
Stranka demokratskog centra Trebinje (3)	-	-	2	0
Seljačka radnička stranka Kozarska Dubice (3)	-	-	2	0
Demokratska stranka Bijeljina (3)	-	-	3	0
Nova radikalna stranka "Nikola Pašić" (3)	-	-	2	0
Otađbinska stranka Banja Luka (3)	-	-	2	0
Radikalni otađbinski front "Nikola Pašić"	-	-	4	+2
Saborna narodna stranka	-	-	2	+2
<i>koalicije</i>				
Demokratski patriotski blok RS	-	-	3	0
Savez za mir i progres RS	-	-	1	0
Združena lista za Bosnu i Hercegovinu	1	0	-	-

(1) Stranke uključene u Združenu listu za BiH (Federacija BiH)

(2) Stranke uključene u Združenu listu za BiH (RS)

(3) Stranke uključene u Demokratski patriotski blok RS

(4) Stranke uključene u Savez za mir i progres RS

Medijska scena Bosne i Hercegovine

BIH	
štampa	145
radio	92
tv	29
agencije	6
ukupno	272

Federacija BiH		Republika Srpska	
štampa	120	štampa	25
radio	56	radio	36
tv	22	tv	7
agencije	5	agencije	1
ukupno	203	ukupno	69

većinsko Bošnjačko stanovništvo		većinsko Hrvatsko stanovništvo	
štampa	110	štampa	10
radio	41	radio	15
tv	17	tv	5
agencije	4	agencije	1
ukupno	172	ukupno	31

Podaci prema izvještaju MEDIA PLAN a iz jula 1996. godine. Nestabilnost medijske situacije odražava se na česte izmjene podataka

U broj radio i tv stanica uključeni su svi produkciono-emisioni punktovi rtv neovisno od njihovog pravnog statusa.

Faktičko stanje nalaže da se mediji u Federaciji BiH posmatraju kao dva odvojena sistema.

U protekloj sedmici posmatrani su sljedeći mediji: *Radio&TV Srpska, Radio&TV BiH, Radio Studio 99, NTV 99, NTV Hayat, Radio FERN, TV Zenica, NTV Zetel, Radio Zenica, Radio Tuzla, TV TPK Tuzla, TV Tuzla, Radio Prijedor, Radio Bihać, Radio&TV Mostar, Hrvatska TV Mostar, Radio Herceg Bosna Mostar, Radio Krajina Banja Luka, TV Srbije, Hrvatska televizija, Oslobođenje, Večernje Novine, Dnevni Avaz, Svijet, Ljiljan, Glas Srpski.*

izvještaj IWPR i MEDIA PLAN; Direktor projekta: Mark Wheeler

Obala Kulina bana 4/I, 71000 Sarajevo, BiH

Tel/fax 071-667-734/735

E-mail: MEDIAPLAN_ZU@ZAMIR-SA.ztn.apc.org

100445.2322@compuserve.com

Institut za ratno i mirnodopsko izvještavanje (IWPR) je britanska dobrotvorna ustanova, osnovana sa namjerom da pomaže razvoj nezavisnih medija i da podrži umjerene glasove u bivšoj Jugoslaviji. Ovaj institut također izdaje *War Report (Ratni Izvještaj)* nezavisni mjesečni list, i *Tribunal*, dvomjesečni časopis o Međunarodnom tribunalu za ratne zločine u Hagu. Za pretplatu i druge informacije obratite se na IWPR 33 Islington High Street, London N1 9LH. Tel +44-171-713-7130 / Fax 713-7140/ E-mail: warreport_gn.apc.org.

Media Plan je prva privatna organizacija u BiH specijalizovana za istraživanje i analizu medija. Glavni cilj mu je da promoviše obnovu i razvoj medija u BiH. Organizacija raspolaže opsežnom bazom podataka o BiH medijskoj slici.

Sa zahvalnošću napominjemo da ovaj projekat podržavaju Swedish International Development and Cooperation Agency, Open Society Institute, Friedrich Naumann Stiftung i Winston Foundation for World Peace.